

REGIONAL NEWS

PM - SPORTS

Prime Minister Narendra Modi an Mizoramin infiamna kawngah ram tana mi tangkai tak tak a nei tih sawiin football hmanga an hmingthanna chu ram tan ahlu hle ani,ati.

Prime Minister chuan Mizoram in Sports Policy mumal tak a nei thei chu lawmawm atih thu sawiin Khelo India Scheme hnuaiah infiammi tha tak tak an awm chho mek a ti a, thalaite tan kawng tam tak hawnsak an tum tih sawiin tunlai mila infiamna kawnga hmasawn tum ani a ti a, National Sports Policy-Khel India Khel Niti hnuaia Mizoram Mizoram thalaite tan kawng thar a inhawng dawn tih a sawi.

Pu Modi chuan khawvel hmun dang nena insumdawn tawnna ah India - in hma a sawn zel tih sawiin infiamna leh kawng hrang hrangah hma a sawn a ti a, thalaite tih hmasawn chu an thupui hmasa ani tih sawiin hemi ti hlawhtling tur hian hmarchhak bialah nasa takin hna an thawk a ti a, infiamna leh kutkawih eizawnna kawng hrang hrangah thalaiten hmabak eng tak an nei tih a sawi bawk.

<><><>

BAIRABI

Prime Minister Narendra Modi-a'n nimina Bairabi-Sairang rel kawng a hawn rual khan Bairabi-ah rel kawng thar hawn lawmna hun buatsaih ve a ni a.

Rel kawng thar hawnna inkhawmah hian zai leh hnam lam te entir niin, school hrang hranga, a hmaa lo neih lawk tawh essay leh painting intihsiakna a ti tha te hnenah lawmman pek an ni a. Prime Minister in Rel chhuakturte a vai liam rual hian chawhma Dar 10:00 -ah Bairabi atanga Rel pahnih— Sairang lam pan leh Kolkata lam pan ten Bairabi Station hi an chhuahsan nghal bawk a ni.

Bairabi a Rel kawng thar hawnna puala hun hmanna ah hian Railway lam hotute leh District aiawhin, Pu Chinlianmanga, SDO Civil Bairabi te, Pu David A Lalhmingchhuana, DIPRO Kolasib te Pu Lalnunpuia SDPO Kolasib te an tel a. Anni bakah hian khawtlang hruaitute, zirlaite l, zirtirtute leh mipui thahnem tak an tel bawk a ni.

<><><>

NPSS

Vawiin hi Presbyterian Naupang Sunday School Inkhawmpui Ni a ni a, Pastor Bial hrang hrangah Naupang Inkhawmpui hi hman a ni.

Naupang Inkhawmpuia hian Pathian thu, hla leh thu inchhang hmangin inelna huaihawt a ni a, naupangten item hrang hrang an nei bawk ani. Naupang Inkhawmpui hi Bial tam zawk chuan intihsiakna atan an hmang a, Bial thenkhat erawh chuan intihsiak lovin an hmang thung. Pastor bial tam takah chuan department pakhat bial chhunga kohhran pakhat an inkhawmpui a, department dang chu veng dang biakinah an inkhawm bawk. Hetihlai hian Naupang inkhawmpui hi hmun thenkhatah khua in a bumro a vangin thulh a ni a, Pathianni leha hmang turin sawn a ni.

Naupang Inkhawmpui hi a tirah chuan Zosapte thahnemngaihna avanga tan a ni a. Kum 1931 khan Aizawl Tlangnuam Kohhranah buatsaih a ni a, hei hi Naupang Inkhawmpui hmasa ber nia hriat a ni. Tunhma lam chuan Naupang Inkhawmpui hi Bial hrang hrangin an remchan hunah an

huaihawt mai thin a, tun hnai deuh atang khan Bial tin an kal rual theih nan MSSU chuan Sunday School Zirlai Syllabus-ah Naupang leh Senior Inkhawmpui hun tur an ruahman tel ve ta a ni. September Pathianni vawi 2-naah Beginner Department-Sacrament Department Pathianni vawi 3-naah Senior Department ten inkhawmpui an nei thin a ni.

<><><>

NCC

National Cadet Corps (NCC) Group Headquarters, Silchar thuchhuak bawhzuiin, Combined Annual Training Camp-90 kal mekah nimin khan 2nd Mizo Battalion NCC, Lunglei chuan Lunglei Lunglawnah hlawhtling takin Vibrant Village Programme an buatsaih.

Vibrant Village Programme-ah hian Commanding Officer, Colonel Sagar K. Mohanty hovin, 2nd Mizo Bn NCC officer leh staff-te, NCC cadet 247 leh Lunglawn Local Council member-te, YMA hruaitute an tel a. Zuk leh hmuam leh ruihhlo dona kawng zawh nei in, NCC cadet-te leh khawtlang thalaite'n inhmelhriatna football leh volleyball an khel a. Excise & Narcotics Department official-te'n ruihhlo leh zuk leh hmuam that lohzia zirtirna hun an hmang bawk.

He hun hi khawtlang mipuite'n vaihlo leh ruihhlo that lohzia inzirtir tharna atan te, infiamna leh hriselna lama thalaite fuih nan atan leh sawrkar leh khawtlang thawh hona tha pawimawhzia zirna atan te an hmang a. Cadet-te pawhin vaihlo leh ruihhlo that lohzia te, hruaitu nih leh mi dang nena thawh ho dan te leh khawtlanga mawhphurhna hrang hrang zirna atan te tangkai takin an hmang bawk ani.

<><><>

OLDEST

Social Welfare Minister Pi Lalrinpuui chuan Pi Lalneihsangi, Pi Buangi tih a koh, tuna Khatla a cheng mek chu Mizo damlai zinga upa berah a puang. Hei hi Social Welfare Department in zirchianna an kalpui a an hmuhchhuah dan behchhana puan a ni. Nimina Aijal Club-a Pi Buangi puala hun buatsaihah Pi Lalrinpuui chuan zirchianna neih hnu a Mizo zinga upa ber nihna a chang thei chu a lawmpui thu Pi Buangi chu a hrilh a. Social Welfare Department chu Sawrkar Department-ah chuan kum upa te lam changtu Department a nih thu leh, tar leh upate pension kan pek thin mai bakah kum tin Upate Ni a hman thin thu te a sawi a. Upate tana Home te, Day Care Centre han siam belh a nih theih nan sawrkar laipuih thlen a nih tawh thu a sawi bawk.

Pi Buangi (Lalneihsangi) hian kumin April ni 14, khan kum 108 tlingin , kum 109-na a hmang mek a ni. Amah hi Aizawl Venghnuai a piang leh seilian niin; an chungkua hi Salvation Army zawm hmasate zinga mi niin; a pa chu Thangchhunga CSM, Mizorama Corps Sergeant Major hmasa ber a ni. Pi Buangi hi Mizo zinga Rehab a thawk hmasa te zinga mi niin, Behala Girls Home Kolkata a hmeichhe rahbi tleu leh fahrah te enkawina hmunah a thawk tawh thin a. Kum 2022 khan Heritage Award buatsaih Mizo Hmeichhe Chhuanawm "Women of Substance" hlan a lo ni tawh ni.

<><><>